



ATASSUT

UPA2015/17

Siverth K. Heilmann

22.04.2015.

Uummasuutillit tunisassiornikkut, ingerlatsinikkut malitsigisaanillu uummasuutit pissarsissutaanerat annertusarniarlugu pissutsit atugaat pillugit pitsaangorsaanissaq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Suka K. Frederiksen, Siumut)

Siullermik apeqquteqaat aallaavigalu siunnersuummik soqutiginarlutut inatsisartuni ilaasortaq Suka K. Frederiksen, Siumut, ATASSUT-miit qutsavigissavarput.

Piviusuuvoq silaannaap kissatsikkiartorneranik oqallittarnitta nunami imaanilu isumalluutitta nassataanik, isumalluarneq annertugaluortoq, ukiormanna ukiuunerujussuata kingunerisaanik inuussutissarsiuteqartut inerisaarusuttunullu akornusersuimmat.

Nunatsinni pisuussutitta tunisassiarineqartarnerisa naleqalersitsinerunissarlu tamatta politikikkut anguniagaraarput, taamaattumillu oqallisissiaqartoq qulequtsiineranut tunngavilersuutaanullu ATASSUT-miit isumaqataalluinnarpugut.

ATASSUT-miit ataatsimiititaliamit angalasarnitsinni, ilaatigut savaatilinniit paasitinneqartarpugut, uumasuuteqarnerup (savaateqarnerup) saniatigut, nunami naatitanik tunisassiorsinnaanissamut aningaasarsiutigissallugu iluatinnaraluaqisoq, ajoraluartumik sukumiisumik aallutarissallugu nukissaqarfiginiarneqarnera killeqarsinnaasartoq.

Taamaattumillu kaamattuutigineqartarluni sapinngisamik allamik aallutaqarani, nunami naatitanik nunatsinni avammullu tunisassiarineqarsinnaasunik inuussutissarsiutigineqarsinnaanerata nukittorsarnissaanut politikikkut tapersersuisoqarnissaa. Pitsaaqutit aporfiiullu tikkuartorneqartarput ATASSUT-miit suleriaqqinnitsinni atorluarniartarpagut.



ATASSUT INATSIARTUNI

Nuannaarutissaavoq isumalluarnarlunilu, nunatta ilarujussuani annertusiartuinnartumik nunami naatitaqartarnikkut tunisassiornissamullu ilapittuutaasinnaasumik annertusiartuinnarmat, matumani misileraanerit aqputigalugit inerisaanissaq ATASSUT-ip tapersersussavaa.

ATASSUT-miit neriuutigilluinnarparput, kujataani savaateqarneq annikilliarorani annertusiartuinnassasoq, taamaatumillu siunnersuuteqartup tikkuagaanut ilaavoq Narsami toqoraaviup nutarterneqarsimasup siunissani annikilliarorani annertusiartortumilli atorluarneqartarnissaanut tamatta aqputissiuussillutalu suleqatigiikkumaartugut.

Nunap ilaani sumiiffinni aalajangersimasuni naasoqassutsikkut nersutillu toqoragassat oqiliartornerannik ajornartorsiortoqarneranik siunnersuuteqartup tikkuagaanut ilaavoq.

Ukiorpassuarni silap allanngorarneratigut, nersutit nujuartat amerlavallaaleraangata aamma nunap naasoqassutsikkut peqassutsikkullu ajornartorsiutinik nassataqarsinnaasarpoq. Taamaattumik kujataani uumasuuteqarnikkut inuuniutillit tatigaagut, ajornartorsiutaalersinnaasut qaangerniarlugit susassaqtut peqatigalugit suleqatigiittoqassasoq.

ATASSUT-miit arajutsisimanngilluinnarparput Nunalerineq pillugu Ataatsimiititaliarsuaqarnera aammalu suliat assigiinngitsorpasuit ingerlanneqarnerat, taamaattumillu Naalakkersuisut akissuteqaataannut aamma paasissutissiiffiusumut qujavugut.

Naggataagut Naalakkersuisunut kaammattuutigiinnassavarput, siusinnerusukkat savaateqarnermi nunaateqarnerullu inerisarneqarnissaanut aningaasaliissutissallu qaffanneqarnerunissaannik kissaateqartarneq pillugu, kingusinnerusumi sulinerminni isummerfigineqartussamik eqqarsaatigilereeqqullugu.

Taamatut naatsumik ATASSUT-miit oqallisissiamut oqaaseqarluta qujavugut.

